

Allanngutissatut siunnersuut

uunga

**Uunga siunnersuut: Umiarsualiviit pillugit Inatsisartut inatsisaat nr. xx,
xx.xxxxx 2015-imeersoq**

Pingajussaanneerinissamut Naalakkersuisunit saqqummiunneqartut

§ 12-imut

1. § 12, imm. 1 imatut oqaasertalerneqassaaq:

”Naalakkersuisut akuersissutini § 5, imm. 1 tunngavigalugu piumasaqaatinik aalajangersaasinnaapput, ilanngullugit inuussutissarsiummik ingerlataqartut umiarsualivimmik perarfissaqartinnejarnissaasa aamma inuussutissarsiummik suliaqarnissamut perarfissaqartitsinissap qulakkeernissaanut pisussaaffeqarneq, akuersissutinik atorunnaarsitsisarneq, akuersissutinik utertitsisarneq, umiarsualivimmik sanaartugartaqartumik taassumaluunniit ilaanik matusinermut imaluunniit piiaanermut aningaasartuutinut qularnaveeqqusiissuteqartarneq pillugit atugassaritaasut.”

§ 25-imut

2. § 25, imm. 1 imatut oqaasertalerneqassaaq:

”§ 12, 14 aamma 15 naapertorlugit taliffissamik innersunneqarneq, usilersornermi usingiarnermilu ikiorserneqarneq kiisalu umiarsualivimmik inuussutissarsiummik suliaqarnissamik perarfissaqarnissaq pillugit aalajangiinerit Naalakkersuisunut naammagittaalliuutigineqarsinnaapput.”

§ 31-imut

3. § 31, imm. 1 imatut oqaasertalerneqassaaq:

”Inatsisartut inatsisaat 1. juni 2015-imi atortuulersinnejarpooq. Tamatumunnga peqatigitillugu Namminersornerullutik Oqartussat umiarsualiviinik sanaartorneq, aserfallatsaalilineq, ingerlatsineq il.il. pillugit Inatsisartut peqqussutaat nr. 4, 29. oktober 1999-imeersoq atorunnaarsinneqarpooq.”

Allannguutissatut siunnersuummut nassuaatit

Nassuaatit nalinginnaasut

1. Allannguutissatut siunnersuut Sanaartornermut Ataatsimiititaliap isumaliutissiissutaa ulloq 16. maj 2015-imeersoq malitseqartillugu saqqummiunneqarpoq. Isumaliutissiissut inatsimmi marlunnik allannguiteqartitsinissamut pissutissaqalersitsisimavoq, § 12 umiarsualiviutileqatigiiffinnut akuersissutinut atugassarititaasut pillugit aamma § 25 naammagittaalliorssinnaaneq pillugu.

2. Nassuaatit nalinginnaasut kalaallisoortaa aamma danskisoortaa, kapitali 6-imi imikkoortumi siullermi Innuttaasunut sunniutaasussat, oqaatsitigut assiginngitsut, Sanaartornermut Ataatsimiititaliap allakkani 8. april 2015-imeersuni Naalakkersuisunut equmaffigequaa.

Danskisoortaani oqaasertai eqqortuupput. Kalaallisoortaa allangortinneqassaaq, taamaalilluni ”akit annikitsumik qaffaateqarnissaat” naatsorsuutigineqartariaqartoq allassimalerluni.

Nassuaatit nalinginnaasut. Kapitali 6-imi immikkoortoq siulleq, Innuttaasunut sunniutaasussat, imatut oqaasertalerneqassaaq:

Suliap pissusissamisornerani umiarsualivimmik nunami sanaartugartaqartumik atuinermut akiliuteqarnissamut akiliisitsisalerneq nutaaq sunaluunniit atuisunut aningaasartuuteqarnissamik malitseqartarpooq. Inuussutissarsiortut umiarsualiveqarfinnik atuisutut pingaaruteqartutut atuisut akiliutissaannik akiliisitsinerit annertunerpaartaat nammattussaavaat, aammalu aallaaviatigut naatsorsuutigineqartariaqarpoq aningaasartuutit taamaattut atuisunut il.il. ingerlateqqinnejartassasut. *Qanorluunniit pisoqaraluarpat innuttaasut taamaattumik atuinermut nioqquissat, sanaartornermut atortussat, maskiinat allallu usit umiarsuarmik assartorneqartussat akiisa annikitsumik qaffaateqarnissaat misigisussaavaat.* Aammattaaq akiusut annertussusaat nunatsimni aalisakkanut nioqquissiarineqartunut tunngatillugu aamma imaatigut ilaasunik angallassinermut billetsit akiinut, siunissami akiusut aalajangersimasut ilusilersugaanerat apeqqutaatillugu sunniisussaapput.

3. Sanaartornermut Ataatsimiititaliap ulloq 16. maj 2015 isumaliutissiissutaa § 16-imut, 21-imut aamma 24-imut nassuaatit erseqqissarneqarnissaannik pissutissaqalersitsivoq.

§ 16-imut nassuaatit

§ 16, imm. 2-imut nassuaatini erseqqissarneqarpoq, akigititat umiarsualiviup pineqartup atorneqarneranut naleqqiullugu assigiimmik annertussuseqartitsinissaq tunngavigalugu aalajangersarneqassasut. Taamaattumik angallannermut immikkullarissumik iluseqartumut, angallannermut allatut iluseqartunut naleqqiullugu naapertuutinngitsumik

nammakiisussamik, akigititassanik aalajangersaasoqarsinnaanngilaq. Tassunga atatillugu akitsuutit umiarsualivinnut tunngasut, angallannerup pineqartup suussusaani inatsisit allat naapertorlugit akilerneqartartut, eqqarsaatigineqassapput.

§ 21, imm. 2-imut nassuaatit

Siunnersuummi § 21, imm. 2 malillugu Naalakkersuisut umiarsualiviup nunami atortulersuutitallip ingerlanneqarneranut aserfallatsaalineqarneranullu aningaasartuutit tamakkiisumik ilaannakortumilluunniit matussutissaannik akiliutit akiliuteqartitsinerullu tunngaviit aalajangersarsinnaavaat.

Taamaaliornikkut atuisut akiliutaat Namminersorlutik Oqartussat umiarsualiviutaanni akilersinneqartut sumiiffigisani umiarsualivinni ataasiakkaani atorneqartarnissaat siunertarineqarpoq.

§ 24, imm. 2-imut nassuaatit

Erseqqissarneqarpoq § 5, imm. 1, aamma 2 naapertorlugit akuersissut kisimi taarsigassarsissutigineqarsinnaanngitsoq imaluunniit qularnaveeqqusunneqarsinnaanani imaluunniit akitsoqarfiusut akiliisitsiniarneranni malersuissutigineqarsinnaanani. Atortut tigussaasut talittarfittut, nunaminertatut inissiiviusartutut aamma illuutit il.il. iluseqartut qularnaveeqqusunneqarsinnaapput, taamatullu taakkua akiliisitsinermi atorneqarsinnaallutik.

§ 5 malillugu akuersissutip tunniunneqarnera Naalakkersuisut akuersissuteqarfigisimassagaat piumasaqaataagaluartoq, akiligassaqarfiusoq atortuni aalaakkaasuni taarsigassarsinermi qularnaveeqqusuilluni pisassaminut piviusumik qularnaveeqquqteqarnissaq angusinnaavaa, tassami umiarsualivik taarsigassarsinermi qularnaveeqqusuissaqartoq akiliivigineqanngippat umiarsualivik tunineqarsinnaassanngilaq. Akuersisummik pigisaqartup nammineerluni imaluunniit akiliisinnajunnaarnermi pigisanik isumaginnittussap eqqartuussissuserisup, taarsigassarsinermi qularnaveeqqusuissaqartoq akiliivigineqaqqaanngippat atortut aalaakkaasut tunisinnaassanngilaat. Qulakkeerneqarpoq umiarsualivik § 5 malillugu akuersisummik peqartoq Naalakkersuisut akuersissuteqarsimannngippata tunniunneqarsinnaanngitsoq, kisianni atortut aalaakkaasut aningasalersuinermi ilaatinneqarnissaat suli ajornassanngilaq.

Allannguutissatut siunnersuummi aalajangersakkanut ataasiakkaanut nassuaatit

Nr. 1-imut

Inuussutissarsiornermut Ataatsimiititaliamit piumaffigineqarneq tunngavigalugu § 12, imm. 1-imi ilanngunneqarpoq ". . . umiarsualivimmi inuussutissarsiummik ingerlataqartut periarfissaqartinneqarnissaasa aamma inuussutissarsiummik suliaqarnissamut

periarfissaqartitsinissap qulakkeernissaanut pisussaaffeqarneq . . .”. Naalakkersuisut inatsimmi § 1 malillugu akuersisummik tunniussinerminni, umiarsualivimmi atortorissaarutit soqtigisaqartut attuumassuteqartut akornanni killilersuinertaqanngitsumik naligiimmillu unammilleqatigiittunut neqeroorutigineqartassasut atugassarititaasussanik piumasaqaateqarnissamut, isummertussaassapput. Tassani ilaatinneqanngitsut tassaassapput pisut immikkut ittut, soorlu assersuutigalugu ingerlatsinissamut akuersisummik pigisaqartup salliusussaatitaaffeqarsimasinnaanera assigisaaluunniit kiisalu Nuummi containerinut terminali nutaaq attartortitsinissaq siunertaralugu immikkut pilersinneqartussaq.

Nr. 2-imut

§ 12-imi allannguuteqartitsinerup kingunerisaanik § 25-imi umiarsualiviup nunaminertaanni inuussutissarsiuteqarnermik suliaqarnermik ingerlatsinissamut atugassaqarnissamut periarfissaqarnissap (periarfissaannginneq) aammalu atugassaqarnissap naammagittaalliuutigisinnaanissaanut periarfissaq ilanngunneqarpoq.

Naammagittaalliuuteqarneq akuersisummik pigisaqartumut ingerlanneqarsinnaassaaq, kisianni aamma suliaqartuusumut, umiarsualivimmi § 5 malillugu akuersisummi pineqartunut ilaasumi attartorsimasumut ingerlanneqarsinnaassalluni.

Nr. 3-imut

Inatsisartut inatsisaata atuutilerfissaa 1. juni 2015-inngorlugu allanngortinneqarpoq.